

NIGITIWATAALE LIWAKATE PEDRO

Nagadi niwakate nigicota mitiwataale liwakate Pedro me didikotibige nigijo loiigi Cristo anilaagitibece. Pedro yalagata Aneotedogoji me ligegi micota me najigotedogowa nigicoa ane dagaxa mele anigida noko, codaa najigotedogowa godoniciwaga me jaoga nigica ane yemaa mele mejinaga. Aagaga yalagata lotaga Aneotedogoji mida loniciwaga. Nigidiaagidi jagaga yalagata micota minoa niigaxinaganadi awitakagaga anodiigaxinagatece ane degewi. Nigijo jotigide Aneotedogoji naga iwi anigotediogi codaa me iloikatidi nigijo oko ane abeyacagaga, odaa icota magaga iloikatidi nigicoa niigaxinaganadi awitakagaga. Nigidiaagidi Pedro jagaga yalagata anodaagee nigica noko Aneotedogoji nige iwi anigotediogi nigina oko, codaa anodaagigote me yaagadi nigina iigo, leegodi libeyacegeco oko. Ele me nalagatibigogoji Aneotedogoji micota me yaagadi niginoa aninoa me jinataga, odaa leeditibige me idinegenagataga me godewiga.

Pedro yecoaditibige nigina anonakato Goniotagodi

1 ¹Ee, Simão Pedro, ee liotagi Jesus Cristo, codaa ee liigexegi. Jiditibigagajitiwaji nagadi iwakate notaganagaxi, akaamitawece aneote Aneotedogoji manakatoni, anagaga igotedogowa. Gotiwagatakanegegi dagaxa me diniwaloe, codaa Aneotedogoji yakadi me najigotedogowa okotawece nigida gotiwagatakanegegi leegodi Aneotedogoji iniaa Gonewikatitogodi Jesus Cristo me igenagatibigiwaji. ²Jemaa Aneotedogoji mepaanaga eletedagadomitwaji, codaa meote gadaalegenali mele, leegodi mowoogotitewaji Aneotedogoji iniaa Goniotagodi Jesus.

Aneotedogoji eniditedogowa, codaa godiolatedice eotedibige godewiga meo nigica ane yemaa mejinaga

³Aneotedogoji ibake loniciwaga me najigotedogowa inoatawece ane jopoogatibige mele me godewigatema digo mijoataga mele, leegodi me jowoogotaga. Aneotedogoji eniditedogowa mida anejinagatege leegodi ikee anodaageeteda me dagaxa mele, codaa midioka limedi meote aneletogodomi. ⁴Joanigidaa leegodi Aneotedogoji meote nigijo ane ligegitedogowa, odaa nigijo ligegi dagaxa me diniwaloe, codaa dagaxa mida ane jaoga. Eote nigida

ligegitedogowa me godaxawa me godewiga digo mijoataga, codaa eote me godiwoko loniciwaga nibeyacegeco ane yaagadi nigina oko anida aneetege nigina iigo leegodi owo niginoa epaa lidagataka lolaadi ane beyagi.

⁵Enice jiniginoka adinoniciwagatitiwaji me iwagati Goniotagodi, pida ele magagakaami nigina oko anidioka limedi meo anele. Pida jiniginoka adinoniciwagatitiwaji mawii anele, pida ele magaga idioka limedi moleetibige mowoogoti nigica Aneotedogoji ane yemaa. ⁶Codaa jiniginoka adinoniciwagatitiwaji mowoogoti nigica ane yemaa Aneotedogoji, pida ele magaga adinajacagatitema niginoa lidagataka godolaadi. Codaa jiniginoka adinoniciwagatitiwaji majacagati gadolaadi, pida ele magaga adinatiitalo niginoa gadawikodico odaa ageyamagatice gatiwagatakanegegi. Codaa jiniginoka adinoniciwagatitiwaji madinatiitalo gadawikodico, pida ele magaga awii nigica aneo Aneotedogoji me ninitedibece. ⁷Codaa jiniginoka adinoniciwagatitiwaji mawii nigica aneo Aneotedogoji me ninitedibece, pida ele magagemaani nigina ganioxoadipi. Codaa jiniginoka adinoniciwagatitiwaji memaani nigina ganioxoadipi, pida ele magaga emaani inatawece oko anodaageeteda Aneotedogoji me yemaa. ⁸Nigidioka limedi mawii niginoa anejitedagawa, odaa agakaamitiwaji nigina oko abacigaga, otegexaagaga akaami nigina oko aneo libakedi ane digica jaoga, nigina mabaatema Goniotagodi. Pida gabakedi ida ane jaoga leegodi mowoogotitetiwaji Goniotagodi Jesus Cristo. ⁹Pida nigina oko ane daga dinoniciwagadi midagae lewiga, nigini oko liciagi nigina oko ane daga leegitece me doletibece. Yaagidi Aneotedogoji naga napitagadi libeyacegeco nigijo jotigide.

¹⁰Enice nigina бага adinoniciwagati gadakataga moikee Aneotedogoji me gadiolaatedice, codaa meniditedagawa mida anenitege. Nigadoniciwagati, odaa nigida makaamitiwaji agaleeeyamagatice gatiwagatakanegegi. ¹¹Codaa nigadinoniciwagatitiwaji, odaa Aneotedogoji ele me dibatedagagitiwaji midioka limedi midiaagonitice minitaga ninioxadi, anei midioka limedi me diigenataka Goniotagodi Jesus Cristo, ane Gonewikatitogodi.

¹²Joanigidaa leegodi me joletibige midioka limedi me jao manalakitibige anodaageni me leeditibige me gadewiki, icaagica nigowoogotitiwaji, codaa nigatitetelogo nigijoa niigenatakanegeco anewi aneetece gotiwagatakanegegi. ¹³Ee yowoogo, malee idewiga me gadoniciwagatitiwaji manalakitibige anodaagee me leeditibige me gadewiki. ¹⁴Igaataga jowoogodi me dagadiaa leegi, odaa ja ideleo, micataga daga jilatí, inenyagaditi yolaadi, iciagi nigina oko ane alatí, odaa nyenyagaditi nibalaacogo. Igaataga jigidaa Goniotagodi Jesus Cristo ane nikeetediwa. ¹⁵Odaa idinoniciwagadi me jao midioka limedi manalakitibigetiwaji ane leeditibige midioka limedi me eni me gadewiki, nige ideleo.

Nigijo oko anonadi notoetiigi Jesus ijaagijo anoditece lowooko Aneotedogoji

¹⁶Ajiwitakaga nigina me jatematiigatagawatiwaji anodaagee Goniotagodi Jesus Cristo meliodi notoetiigi nigijo negenagi. Igaataga okomogoko jinataga nigijo Aneotedogoji naga nelecagatee. ¹⁷Idejonagatice manitaga wetiga Aneotedogoji naga iwenigide Jesus. Odaa Aneotedogoji ane Eliodi Jesus jegeote meliodi me datale Jesus. Odaa Aneotedogoji ane datale, anida nimawenegegi catedi inoatawece, mee, “Nigidoa Ionigi dagaxa me jema. Codaa eote me dagaxa me idinitibece.” ¹⁸Okomogoko jajipaagatalo nigijoa Aneotedogoji lotaga ane icogotibigimece ditibigimedi, nigijo midiaagejonagatice nebi Goniotagodi manitaga wetiga, Aneotedogoji ane iomagaditedice.

¹⁹Jegepaanaga jowoogotaga lotaga nigijo anoyatematitedibece Aneotedogoji lowooko nigijo jotigide, nigijoa latematiko ewi. Odaa ele matacolitece nigijoa latematiko. Igaataga latematiko liciagi nagana lokokena ane datale miditaga nexocaga digoina iigo nigepaa yelogotibige. Odaa datale catiwedi gadaalegena nigepaa nigica noko Aneotedogoji ane nibikota Cristo nige dopitedijo. Odaa nigica noko liciagi nigina naga nodi yotedi-eloodo nigidatege nigoi. ²⁰Pida dagaxa mele mowoogotitiwaji me digica ane yakadi me ibake nigica epaa lixakedi me yowoogodi lotaga nigijo anoyelogoditedibece Aneotedogoji lowooko. ²¹Igaataga nigijo anoyelogoditedibece Aneotedogoji lowooko agoyelogoditedibece nigicoa epaa lowooko, otegeaxagaga oibake nigicoa anepaa lixaketedi. Pida nigijo moyatematitedibece latematiko, Liwigo Aneotedogoji yajacagadi lowooko, codaa ikeetigi ane yema me ligegi Aneotedogoji.

Niigaxinaganadi anodiigaxinagatece ane degewi

(Judas 3-16)

2 ¹Nigijo jotigide ijo oko awitakaga anodi moyelogoditedibece lowooko Aneotedogoji. Nigijoa awitakagaga icotiigi liwigotigi loiigi Israel. Odaa idaagee jagaga ototicogi gadiwigotigitiwaji oko awitakaga anodi mewi modiigaxinagatece gotiwagatakanegegi. Odiigaxinagatece niigaxinaganegeco ane degewiteda owotibige moibeyacagadi gatiwagatakanegegitiwaji. Nigijoa liigaxinaganegeco doide. Pida nigina oko agoyowoogodi nigijoa liigaxinaganegeco me lakapetedi Aneotedogoji lotaga. Codaa nigijoa awitakagaga modi Jesus me daga Goniotagoditeda ane nadoogodi lawodi meote me godilagatege Aneotedogoji. Joanigidaa leegodi Aneotedogoji nige yaagadi nigina me dogoditigi. ²Eliodi oko odioteci nigijoa liigaxinaganegeco, odaa owo niginoa ane beyagi godolaadi ane yema. Odaa leegodi mowo niginoa ane beyagi, odaa eliodi oko beyagi modotagatibige gotiwagatakanegegi anewi. ³Odaa leegodi me oceegaga nigijo niigaxinaganadi awitakaga, odaa odinigaanyetece ganinyelotiwaji, codaa etigadinaaleni mowotibige me iwagatitiwaji niginoa ane degewi. Pida ja jotigide Aneotedogoji me iwitediogi, odaa ja igo me iloikatidi, codaa me yaagadi nigijoa awitakagaga.

⁴Igaataga nigijjo jotigide Aneotedogoji aika moiwoko nigijjoa aanjotedi anowo ane beyagi, pida iloikatidi. Yokoletediogi manitaga niwilogonagaxi nigica natinedi aneitece monibeotege nigica anodigotioyi. Odaa ja niwilotediniwace, odaa diigenatakatediogi monigoetiniwace oyattitioyi galeinatedi miditaga nexocaga monibeotege nigica noko nige iwi anigotediogi iditawece oko odaa iloikatidi leegodi loenataka ane beyagi. ⁵Codaa Aneotedogoji aiwoko nigijjo oko abeyacagaga ane ligeladi digoina iigo maleedigicota nigijjo aboogo-ninyogodi. Pida ja niige aboogo-ninyogodi me yaagadi inatawece oko leegodi me nakapetegi. Pida Noé yatematitioyi ijotawece nigijjo noiigi Aneotedogoji me igenaga, odaa Aneotedogoji eote me iwoko ijokijjo Noé ijaagijjo loiigiwepodi anijjo seete oko. ⁶Codaa Aneotedogoji iloikatidi nigijjo nigeladimigipitigi nigotadi Sodoma aniaa Gomorra, ane dagaxa minoa libeyacegeco. Odaa Aneotedogoji ja yalegi, odaa inoka yeyagatice lajimaga. Jigidaagigotediogi Aneotedogoji me ikeetediogi inatawece oko anodaagigotediogi nigina eledi oko anowo ane beyagi liciagi nigijjo anowo nigeladimigipitigi nigidiwa nigotadi, odaa ja nakapetegi. ⁷Nigijjo Aneotedogoji naga yaagadi nigijjoa nigotadi, begeote Ló me iwoko. Ló goneleegiwa ane igenaga, pida eliodi magecagalo leegodi libeyacegeco nigidi noiigi abeyacagaga anowote. ⁸Leegodi nigijjo goneleegiwa ane igenaga idiaa ligeladi miditaga nigidi noiigi, odaa inoatawece nokododi nadi codaa wajipatibece nigijjo oko mowo ane beyagi codaa me lakapetedipi Aneotedogoji. Odaa Ló laalegena anele eliodi magecagalo. ⁹Odaa Goniotagodi Aneotedogoji yowoogodi me yatamagatee nigina oko ane igenaga nigina godaxakawa micaanigigota me domegeo me nawikodeega. Codaa Goniotagodi Aneotedogoji yowoogodi meote anigotediogi nigina oko anodakapetege me daga iwoko nigica noko nige limedi me iwi codaa me iloikatidi inatawece nigina oko ane dogoyiwagaditeda. ¹⁰Codaa Aneotedogoji eliodi me iloikatidi nigina oko aninokowo ane beyagi anepaa yemaa nigina lolaadi meo, codaa agoyiwagadi otaagidaatece nigijjo anida nagatetigi Aneotedogoji ane yajigote.

Niginoa niigaxinaganadi awitakaga agica anodeemitetibige codaa anagaxakenagaga. Codaa agodoita nigina me beyagi modotagatibige nigicoa aanjotedi digoida ditibigimedi ane dataletibigiwaji liciagi Aneotedogoji me datale. ¹¹Nigicoa aanjotedi ida nimawenegegi caticedi niginoa niigaxinaganadi awitakaga, codaa dagaxa meletibigiwaji caticedi niginoa niigaxinaganadi awitakaga. Pida nigicoa aanjotedi baadaga beyagi modotagatibige niginoa niigaxinaganadi awitakaga otegeaxagaga nilaagetedipi lodoe Goniotagodi Aneotedogoji. ¹²Pida niginoa niigaxinaganadi awitakaga onietigi niginoa ane digicoa moyowoogodi. Odaa jigidaa me liciagi niginoa eijedi aninoa me godawikajetedi. Codaa onietiniwace niginoa ane dogoyowoogoditeda, odaa jigidaa Aneotedogoji micota me yaagadi digo micataga me jinigotaga niginoa eijedi ane godawikajetedi. ¹³Jigidaa Aneotedogoji me yajigotediogi nigica loojedi ane igenaga niginoa loenataka ane beyagi. Jigidiaagidi nigica ane dagaxa macipegegipi, codaa mowo nigina ane napioi idatawece noko. Nigina me

gagiiwepodi owote niginoa ane beyagi, odaa niginoa anowote liciagi nigina liwile nigina nowoodagagi ane yapidi aneo me godiboliga. ¹⁴Oiwita nigina iwaalepodi, odaa ja lowoogo dogodaa noomatewadi, codaa idioka limedi mowo ane beyagi. Oninaaletiniwace nigina oko ane daga datiteteloco eliwagatakanegegi, codaa oyowoogodi modinigaanyetece niginoa ane nepilidi eledi oko, leegodi agilogonadi mowote nigijoa loenataka ane beyagi. Pida Aneotedogoji ja nixootediniwace. ¹⁵Nigijo nogoika naigi anewi, odaa jaganiatagigipi. Odaa jogodioteci nigijo naigi ane degele, odaa ja liciagi Balaão, nigijo lionigi Beor, aneo nigijo jotigide, leegodi dagaxa me yemaa me dinigaanyetece dinyeelo meo nigina ane beyagi. ¹⁶Odaa Aneotedogoji ja yapetege Balaão leegodi libeyacegegi. Jowoogotaga nagana emadica me daga dotaga. Pida Aneotedogoji eote nagajo Balaão nemadica me dotaga micataga nigina oko, odaa jigidaagee Aneotedogoji me ibake nagajo emadica me yoxogo Balaão me domegego nigica letolegegi.

¹⁷Niginoa niigaxinaganadi awitakaga liciagi nigina ninyogodi libegi ane ipe, codaa liciagi niginoa loolatedi niwocotaga ane nadeegi, pida agica ebici nigina me domaga jopoogatibige ninyogodi. Aneotedogoji ja iomagaditetema nigica aneyate niginoa niigaxinaganadi awitakaga nigica ane dagaxa me nexocaga me iloikatidi nigepaa ganigicatibige. ¹⁸Anagaxakenagaga nigina me notaganaga, codaa oibake niginoa notaga yetoledi. Nigina me notaganaga, odaa oyalaagata niginoa lidagataka godolaadi moninaaletiniwace codaa moyamagateeticoace nigina oko ane gela me domogoika nigina oko anepaa dininaaletibigiwaji leegodi nigina mowo ane beyagi. ¹⁹Nigidi niigaxinaganadi awitakagaga moditogi nigina oko moyakadi moika niginoa Aneotedogoji liigenatakanegeco. Pida idiaagidi liotaka nibeyacegeco ane yaagadi nigina oko, igataga nibeyacegeco jogodinigaanyetece codaa ja iige lewiga. ²⁰Nigica nibeyacegegi yaagadi nigina oko anida aneetege nigina iigo. Pida nigina oko yakadi me iwoko nigina ane beyagi nigina nigoyowoogodi Goniotagodi Jesus Cristo, ane Gonewikatitogodi. Pida nige dibataciogi nigica ane beyagi, odaa nigeyamagaticoace, odaa nigina oko liciagi ja dagaxa me beyagitibigiwaji caticedi nigijo maleedogoyowoogoditeda Goniotagodi. ²¹Nigina oko meyamagaticoace meniawagatakanaga, domaga dagaxa meletema nigidi oko daaditigica moyowoogodi naigi ane igenaga, odaa agele nigina naga domogoyowoogodi naigi ane igenaga, odaa jegeyamagaticoace odaa agaleegodiatece Aneotedogoji liigenatakanegegi anijo modibatege. ²²Nigina nogodiotaceci lewiga oxiiigodi, odaa oiikee nigida nigege mewi, nigina moditibece, “Nigina necenigo opitege lokomaga, codaa nigina nigidagiwaga anonilege icotaca me dinapaloogatidi.”

Lanokegi Goniotagodi

3 ¹Yokaagetedipi yemaanigipi, nagajo eledi iwakate notaganagaxi ane jiditibigagajitiwaji nagajo odoeje iwakate. Odaa nagadi jegeledi iwakate notaganagaxi ane jiditibigagajitiwaji, jaotibige manalakitibige codaa me gadaxawanegegitiwaji mowoo nigijoa baanaga jiigaxinaganagatece, leegodi jogoleetibigetiwaji mowoo nigica ane igenaga.

2Jemaa manalakitibigeti waji lotaga nigijo anoyelogoditedibece lowooko Aneotedogoji nigijo jotigide, nigijo anida aneetetege Aneotedogoji. Codaa jemaa manalakitibige liigenatakanegeco Goniotagodi ane Gonewikatitogodi, nigijoa niigenatakanegeco anoiigaxitedagadici nigijoa liigexedi Goniotagodi.

3Odojege nimesi leeditibige mowoogotitiwaji nigica anodaagee nigowidijedi nokododi nigina iigo, odinikeetagawa goneleegi wadi anetigadamenti waji. Niginoa lidagataka godolaadi ane beyagi oiige lewiga nigidiwa goneleegi wadi.

4Codaa moditibece, “Jesus Cristo ligegi me dopitedijo digoina iigo. Pida igoataga? Akaa ligegitediogi nigijo godiododipi, pida ja nigo, codaa idioka limedi nigijo anejinaga maleekoka yoeteda Aneotedogoji nigina iigo!” 5Nigidiwa goneleegi wadi domogoyemaa moyaagiditibige nigijo jotigide Aneotedogoji mokexaa ligegiteda, oadaa jigidaagee naga iliidagadi ditibigimedi codaa me iigo.

Oadaa Aneotedogoji ibake ninyogodi meote nigina iigo. Oadaa naga iomagadi ninyogodi, oadaa ja dinikee iigo liwigotinigi ninyogodi. 6Oadaa nigidiaagidi Aneotedogoji ja ibake ninyogodi me yaagadi ijoatawece anijoa nigijo jotigide naga niige aboogo-ninyogodi me yapogoditedini inoatawece niginoa aninoa digoina iigo. 7Pida niginoa nokododi Aneotedogoji eyotetteda ditibigimedi codaa me nigina iigo. Oadaa aagaaga ibake ligegi me doweditedeloco nigepaa nigica noko nige ibake noledi me yaagaditace inoatawece niginoa aninoa. Nigica noko Aneotedogoji iwi anigotediogi, codaa yaagadi nigina oko ane nakapetegi.

8Yokaagetedipi yemaanigipi, jinaga gadaagititiwaji Goniotagodi me idigote onidateci noko me micataga daga onaniteci miili nicaagape, codaa idigote onaniteci miili nicaagape me micataga daga onidateci noko.

9Goniotagodi adinopagadi meote nigina ane ligegi, codaa alowoocagawa nigina oko anodiletibige daaditigicota nigina ane ligegi. Pida Aneotedogoji dinatitedagawatiwaji, leegodi ayemaa digica ane yaagadi, pida domaga yemaa minatawece oko dinilaatibigiwaji, oditaga jogoika mowo ane beyagi.

10Pida nigica noko anicota menagi liciagi nigina olicegegi me daga inibeonagatege, codidigida nigenotio. Jigidaagee nigica noko Goniotagodi nige iwi anigotediogi codaa me iloikatidi nigina oko. Nigica noko inoatawece digoida ditibigimedi daa. Nigica nige daa oadaa eliodi nigica layaagegegi. Oadaa inoatawece anejinataga digoida ditibigimedi yabidi, oadaa iigo codaa minoatawece ane loenataka nigina oko yabidi. 11Oadaa nige nigidaagee Aneotedogoji me yaagadi inoatawece ane jinataga. Enice, igamodaa leeditibige mejinaga me godewiga? Leeditibige me jikanaga inoatawece ane beyagi, oadaa ele me joleegatibige me godewigatema iniokiniwateda Aneotedogoji.

12Codaa leeditibige me idinenyagatagatege nigica noko, oadaa joleegatibige me idinoniciwagataga me jigotaga libakedi Goniotagodi amaleegaga jinagenaga meno nigica noko Goniotagodi. Nigica noko Aneotedogoji yalegi, codaa me yaagadi ditibigimedi, codaa dalole inoatawece niginoa aninoa digoida ditibigimedi. 13Pida baga inibeonagatege Aneotedogoji ane ligegitedogowa

meote. Eote gela ditibigimedi, codaa me gela iigo aneitice nigina oko ane nepilidi Goniotagodi mowo inokina ane igenaga.

¹⁴Enice, yokaagetedipi yemaanigipi, maleeganibeoonitege nigica gela ditibigimedi icaagica gela iigo, adinoniciwagatitiwaji me dagadiaagica gabatiigi, codaa oleetibigetiwaji gadaalegena me yapidi lodoe Aneotedogoji amaleegaga eote gadaalegenali mele. ¹⁵Digowoo Goniotagodi Aneotedogoji eliodi me dinatitediogi nigina oko eotedibige moyakadi modinilaatece libeyacegeco, codaa me iwoko nige limedi Goniotagodi Aneotedogoji me iwi anigotediogi me iloikatidi nigina oko. Odaa jigidaa gonioxoa Paulo godemaanigi me didikotibigajitiwaji. Nigina me didiko, ibake lixakedi Aneotedogoji ane yajigote. ¹⁶Odaa inoatawece niginoa liwakatedi ane iditedi yalagata nigica noko Aneotedogoji, codaa anodaa leeditibige mejinaga me godewiga. Iditedini niginoa notaga ane galaga me jowoogotaga ane diitigi. Odaa nigina oko ane degeliodi eliwagatakanegegi, codaa nigina oko ane dogoyemaa moyowoogodi nigica anewi, odaa nigidi oko aigenaga moyelogodi lotaga Paulo, odaa idaagodigotalo moyatemati eletidi liwailidi Aneotedogoji lotaganagaxi. Odaa jigidaa leegodi Aneotedogoji micota me iloikatidi codaa me yaagadi nigidi oko.

¹⁷Yokaagetedipi yemaanigipi, akamagakaami jogowoogotitiwaji micota mina niigaxinaganadi awitakagaga. Odaa adinoweti me daga iwitece liigaxinaganegeco niginoa goneleegiwadi abeyacagaga ane dogoyiwagaditeda liigenatakanegeco Aneotedogoji. Nige iwitece niginoa liigaxinaganegeco niginoa goneleegiwadi, odaa jagamigiticoace naigi anele, codaa gatiwagatakanegegi agalee yoniciwadi. ¹⁸Pida oleetibigetiwaji gatiwagatakanegegi midioka limedi me ili leegodi dagaxa meletedogodomi Goniotagodi Jesus Cristo ane Gonewikatitogodi. Codaa adinoniciwagatitiwaji mepaanaga owoogoti Goniotagodi. Jemaanaga inatawece oko moiwenigide Goniotagodi niginoa nokododi, nigepaa ganigicatabige. Odaa jigidaagee. (Amém).